

Bosna i Hercegovina
Federacija Bosne i Hercegovine
KANTON SARAJEVO
Ministarstvo zdravstva



Босна и Херцеговина
Федерација Босне и Херцеговине
КАНТОН САРАЈЕВО
Министарство здравства

Bosnia and Herzegovina
Federation of Bosnia and Herzegovina

CANTON SARAJEVO
Ministry of Health

PRAVILNIK
O ETIČKOM KODEKSU POSLOVNOG PONAŠANJA DRŽAVNIH
SLUŽBENIKA I NAMJEŠTENIKA U
MINISTARSTVU ZDRAVSTVA KANTONA SARAJEVO

Sarajevo, juni 2023. godine



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-104, Fax: + 387 (0) 33 562-243
Web: <http://mz.ks.gov.ba>, E-mail: mz@mz.ks.gov.ba

U skladu sa Etičkim kodeksom za državne službenike u Federaciji Bosne i Hercegovine ("Službene novine Federacije BiH", broj: 63/20), Zakonom o državnoj službi u Federaciji BiH ("Službene novine Federacije BiH", br. 29/03, 23/04, 39/04, 54/04, 67/05, 8/06 i 4/12, 99/15 i 9/17 - Presuda Ustavnog suda Federacije Bosne i Hercegovine broj U-13/16 - u daljem tekstu: Zakon o državnoj službi), a na osnovu člana 70. stav (2) Zakona o organizaciji organa uprave u Federaciji BiH („Službene novine Federacije BiH“ broj: 35/05), Ministar zdravstva Kantona Sarajevo Sarajevo, d o n o s i

P R A V I L N I K

o etičkom kodeksu poslovnog ponašanja državnih službenika i namještenika u Ministarstvu zdravstva Kantona Sarajevo

I

Pravilnikom o etičkom kodeksu poslovnog ponašanja državnih službenika i namještenika u Ministarstvu zdravstva Kantona Sarajevo (u daljem tekstu: Etički kodeks za državne službenike i namještenike Ministarstva) uređuju se principi ponašanja državnih službenika i namještenika (u daljem tekstu: zaposlenici) u Ministarstvu zdravstva Kantona Sarajevo (u daljem tekstu: Ministarstvo), u vršenju zadataka predviđenih opisom radnog mjesta u odnosu na nadređene i podređene zaposlenike, saradnike, građane, kao i korisnike usluga Ministarstva i druge subjekte.

II

Cilj Etičkog kodeksa za državne službenike i namještenike Ministarstva je da zaposlenik svojim ponašanjem štiti javni i privatni interes zasnovan na ustavu i zakonu, i na taj način doprinosi jačanju uloge i ugleda Ministarstva.

III

U ostvarivanju principa Etičkog kodeksa za državne službenike i namještenike Ministarstva, svaki zaposlenik je obavezan da preduzima određene radnje i mjere koje su propisane, izbjegava i suzdržava se od onih radnji koje nisu dopuštene ili su zabranjene.

IV

U izvršavanju zadataka predviđenih opisom radnog mjesta, zaposlenik osigurava:

- Poštivanje Ustava Bosne i Hercegovine, Ustava Federacije Bosne i Hercegovine, Ustava Kantona Sarajevo, zakona i drugih propisa u državi Bosni i Hercegovini, Federaciji Bosni i Hercegovini i Kantonu Sarajevo;
- Poštivanje pravnog poretka države Bosne i Hercegovine i Federacije Bosne i Hercegovine, kao i načela međunarodnog prava;
- Sprečavanje zloupotrebe pozicije u Ministarstvu u korist privatnog interesa;
- Savjesno, stručno, samostalno i odgovorno obavljanje zadataka, uz puno zalaganje za afirmaciju Ministarstva i čuvanje njegovog ugleda, o čemu se mora voditi računa i van radnog vremena;
- Profesionalno, ljubazno i pristojno ponašanje, poštivanje ličnosti i dostojanstva građana kao stranki;
- Poštivanje radne discipline i omogućavanje neometanog procesa rada;
- Razvijanje ličnog entuzijazma za rad u Ministarstvu;
- Profesionalne odnose i radnu atmosferu, koji se zasnivaju na uzajamnom poštivanju, povjerenju, saradnji, pristojnosti i strpljenju;
- Da izbjegava radnje koje bi imale štetne posljedice po ugled Ministarstva;
- Brigu o zdravom i lijepom radnom okruženju u službenim prostorijama;
- Prikladno i uredno odjevanje, primjereno poslovima državnog službenika i da svojim načinom odijevanja na radnom mjestu ne narušava ugled;
- Svođenje privatnih posjeta na radnom mjestu na najmanju mjeru;



- Kontinuirano opće i stručno obrazovanje, kao i usavršavanje;
- Nesebično prenošenje svog znanja na druge uposlenike u službi i da im daje tačne informacije;
- Razvijanje kolegijalnih i korektnih odnosa prema drugim uposlenicima, i izbjegavanje sklonosti ka favorizovanju određenog uposlenika.
- Da se u kriznim i vanrednim situacijama (stanje prirodne nepogode, tehničko-tehnološke nesreće i druge nesreće) u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10), odgovorno ponaša i da poštuje opća uputstva i preporuke nadležnih tijela;
- Da u kriznim i vanrednim situacijama državni službenik koji rukovodi organom državne službe kao i rukovodioci organizacionih jedinica poslovne aktivnosti reorganiziraju i upravljanje ljudskim resursima prilagode kriznoj situaciji s ciljem minimiziranja negativnih efekata na zdravlje i živote ljudi i nesmetanog funkcioniranja u odnosima sa krajnjim korisnicima usluga i drugim zainteresiranim stranama.

V

Zaposleniku nije dozvoljeno:

- Korištenje imovine Ministarstva u privatne svrhe, a posebno korištenje imovine protivno interesu Ministarstva.
- Povlašćivanje i prekoračivanje određenih prava zbog političke, nacionalne, vjerske, spolne ili druge pripadnosti;
- Zahtijevati ili primati od fizičkih ili pravnih osoba poklon, niti bilo kakvu uslugu ili drugu korist za sebe ili druga lica u vršenju svoje dužnosti, osim protokolarnog ili prigodnog poklona manje vrijednosti;
- Favorizovanje određene fizičke ili pravne osobe u postupku rješavanja predmeta;
- Koristiti duhanske prerađevine, osim na mjestima koja su saglasno za to određena;
- Davanje informacija koje nisu u skladu sa zakonom, drugim propisom, pravilima i zahtjevima Ministarstva;
- Zloupotreba pozicije u Ministarstvu u korist privatnog interesa;
- Nanošenje materijalne štete Ministarstvu, namjerno ili iz krajnje nepažnje ili podstrekivanje drugih da to čine;
- Korištenje, posjedovanje, prodaja, prenošenje ili kupovina alkohola i drugih zabranjenih sredstava;
- Koristiti službene oznake ili autoritet radnog mjesta u Ministarstvu u obavljanju privatnih poslova;
- Imati tetovaže na vidljivim dijelovima tijela, te imati probušene pojedine dijelove tijela, osim ušiju.
- Isticanje simbola političkih stranaka, niti njihov propagandni materijal, te da javno ispoljava svoje uvjerenje vezano za političke stranke i njihovo djelovanje;
- Da utiče na političko opredjeljenje drugih državnih službenika;
- Preduzimati aktivnosti koje u javnosti mogu biti percipirane kao podrška političkoj partiji ili kao podrška političkoj aktivnosti bliskog srodnika.

VI

Neprikladnom odjećom smatra se naročito:

- a) za muškarce: kratke pantalone ili druge pantalone koje u stojećem stavu dosežu iznad članaka, bluza/majica koja nema kragu i/ili rukave i/ili je neuobičajenih/živih boja, te obuća otvorenih prstiju;
- b) za žene: previše otvoren vratni izrez bluze/majice i/ili bluza/majica bez leđa i bez rukava, suknja ili kratke pantalone koje u stojećem stavu dosežu iznad koljena više od pet centimetara, te neprimjerena obuća (papuče ili druga obuća otvorenih prstiju koja se sa zadnje strane ne pridržava uz nogu);
- c) sportska odjeća, veća oznaka ili natpis na odjeći, simbol koji može biti uvredljiv ili iritantan po bilo kojem osnovu, nepokriveni torzo, te nošenje kape u službenim prostorijama Ministarstva.



VII

Svaki zaposlenik, kao i onaj koji se prvi put zapošljava u Ministarstvu, dužan je potpisati akt o poznavanju sadržaja Etičkog kodeksa za državne službenike i namještenike Ministarstva. Akt o poznavanju sadržaja Kodeksa je sastavni dio personalnog dosjea zaposlenika.

VIII

Odredbe ovog Etičkog kodeksa za državne službenike i namještenike Ministarstva će se primjenjivati i na:

- lica koja su zasnovala radni odnos imenovanjem, odnosno postavljenjem na radna mjesta u Ministarstvu;
- pripravnike i osobe koje u radnom vremenu obavljaju poslove za Ministarstva na osnovu ugovora o djelu odnosno sporazuma sa Ministarstvom bilo koje vrste.

IX

Nadzor nad sprovođenjem Etičkog kodeksa za državne službenike i namještenike Ministarstva vrši osoba iz reda zaposlenika ministarstva koju imenuje Ministar, a u slučaju nepoštivanja principa i pravila Etičkog kodeksa za državne službenike i namještenike Ministarstva, Ministar će poduzeti mjere u skladu za pozitivnim propisima.

X

Ovaj Pravilnik o etičkom kodeksu stupa na snagu danom donošenja.

XI


Ovaj Pravilnik biće objavljen na web stranici Ministarstva zdravstva Kantona Sarajevo (www.mz.ks.gov.ba).

Broj:10-33- 30336 /23
Sarajevo, 26. juni 2023godine



MINISTAR

Prof.dr Haris Vranić





Bosnia and Herzegovina
Federation of Bosnia and Herzegovina

CANTON SARAJEVO
Ministry of Health

Broj:10-33- 30336-1 /23

Datum, 26.06.2023. godine

U skladu sa Etičkim kodeksom za državne službenike u Federaciji Bosne i Hercegovine ("Službene novine Federacije BiH", broj: 63/20), i tačkom IX Pravilnika o etičkom kodeksom poslovnog ponašanja državnih službenika i namještenika u Ministarstvu zdravstva Kantona Sarajevo Broj:10-33- 30336 /23 od 30. juni 2023 godine, a na osnovu člana 70. stav (2) Zakona o organizaciji organa uprave u Federaciji BiH („Službene novine Federacije BiH“ broj: 35/05), Ministar zdravstva Kantona Sarajevo Sarajevo, d o n o s i

RJEŠENJE

I

Ovim Rješenjem imenuje se osoba za nadzor nad sprovođenjem Pravilnika o etičkom kodeksu poslovnog ponašanja državnih službenika i namještenika u Ministarstvu zdravstva Kantona Sarajevo (u daljem tekstu: Etički kodeks za državne službenike i namještenike Ministarstva).

II

Za nadzor primjene Etičkog kodeksa za državne službenike i namještenike Ministarstva imenuje se Šejla Brković.

III

Ovo Rješenje stupa na snagu danom donošenja.



Dostaviti:

1. Imenovanj;
2. Svim državnim službenicima i namještenicima u Ministarstvu;
3. a/a.